

II.

Séu stíur og/eða tilheyrandi aðstaða þannig að mjög erfitt eða kostnaðarsamt er að uppfylla allar kröfur þessarar reglugerðar, en eigendur óska eftir að halda starfseminni áfram, er heimilt að sækja um undanþágu frá einstökum ákvæðum hennar. Landbúnaðarráðuneytið getur veitt slíka undanþágu til tveggja ára í senn að fenginni umsögn héraðsdýralæknis. Þó skulu undanþágur ekki veittar til lengri tíma en sex ára frá gildistöku reglugerðarinnar.

Landbúnaðarráðuneytið, 26. apríl 1991.

Steingrímur J. Sigfússon.

Jón Höskuldsson.

REGLUGERÐ

um Íþróttamiðstöð Íslands.

I. KAFLI**Hlutverk.**

1. gr.

Íþróttamiðstöð Íslands (ÍMÍ) er þjónustustofnun sem hefur það meginhlutverk að stuðla að heilbrigðu lífi og heilsurækt allra landsmanna jafnt meðal almennings, skólafólks og fatlaðra sem keppnis- og afreksfólks í íþróttum með íþróttir, íþróttafræðslu og útivist að leiðarljósi.

II. KAFLI**Markmið.**

2. gr.

Að veita viðskiptavinum, einstaklingum sem hópum, góða aðstöðu og þjónustu árið um kring til æfinga og keppni, funda, námskeiðis- og ráðstefnuhalds eða annarrar tómstunda-starfsemi.

3. gr.

Að leiðbeina og fræða um íþróttir, útiveru, heilsurækt og félagsmál á eigin vegum eða í samvinnu við aðra.

4. gr.

Að hvetja fólk, einstaklinga og félagasamtök, til aukinnar þátttöku og samstarfs í íþróttum, jafnt almenningsíþróttum sem keppnisíþróttum.

III. KAFLI**Samstarf.**

5. gr.

ÍMÍ er sameign íslenska ríkisins og íþróttþreyfingarinnar (Íþróttasambands Íslands og Ungmennafélags Íslands). Starfsemi og uppbygging ÍMÍ er samstarfsverkefni menntamála-ráðuneytisins, Laugardalshrepps, Menntaskólans að Laugarvatni, Héraðsskólans að Laugarvatni, Íþróttakennaraskóla Íslands, Ungmennafélags Íslands og Íþróttasambands Íslands samkvæmt samningi þar um.

IV. KAFLI

Stjórnun.

6. gr.

Menntamálaráðherra skipar sjö fulltrúa í stjórn ÍMÍ til fjögurra ára í senn að fengnum tillögum frá eftirtöldum aðilum sem tilnefna einn fulltrúa hver: Íþróttasambandi Íslands, Ungmennafélagi Íslands, Íþróttakennaraskóla Íslands, Laugardalshreppi og frá öðrum skólum á Laugarvatni sameiginlega. Auk þess skal forseti ÍSÍ eiga sæti í stjórninni og vera formaður hennar. Menntamálaráðherra skipar varaformann án tilnefningar. Aðrir varamenn skulu skipaðir á sama hátt.

7. gr.

Hlutverk stjórnar er að móta markmið og stefnu ÍMÍ, ráða framkvæmdastjóra og vinna ásamt honum að uppbyggingu starfseminnar og vera menntamálaráðuneytinu til ráðgjafar um gerð og uppbyggingu íþróttamannvirkja að Laugarvatni. Stjórnin skal gera samninga um afnot af landi, íþróttamannvirkjum, húsnæði og annarri aðstöðu sem starfsemin þarfnast og ákveða gjaldskrá fyrir selda aðstöðu og þjónustu.

V. KAFLI

Rekstur

8. gr.

Stjórnstöð ÍMÍ er að Laugarvatni enda miðast reksturinn við að nýta þau íþrótt- og skólamannvirki að Laugarvatni, sem eru í eigu ríkisins, utan skólatíma samkvæmt samningi þar um.

9. gr.

Framkvæmdastjóri annast daglegan rekstur ÍMÍ og framkvæmir samþykktir stjórnar. Ennfremur er hlutverk framkvæmdastjóra:

Að annast bókhald og fjárreiður.

Að ráða starfsfólk.

Að gera tillögur til stjórnar um starfsemi ÍMÍ.

Að leggja fyrir stjórn áætlun um starfsemi hvers árs.

Að semja rekstraráætlanir.

Að vinna að kynningu Íþróttamiðstöðvarinnar.

10. gr.

Tekjur ÍMÍ eru eftirfarandi:

a. Tekjur af seldri aðstöðu og þjónustu.

b. Framlög frá ÍSÍ og UMFÍ.

c. Framlög frá ríkissjóði samkvæmt því sem ákveðið kann að vera í fjárlögum.

d. Framlög frá öðrum aðilum.

Stjórn ÍMÍ getur ekki skuldbundið ríkissjóð umfram þær fjárveitingar sem nefndar eru í c.- lið.

11. gr.

Reikningsár ÍMÍ skal vera almanaksárið. Ársreikningur ÍMÍ, endurskoðaður af löggiltum endurskoðanda, skal lagður fyrir stjórnina eigi síðar en 31. mars ár hvert og sendur ríkisendurskoðun.

VI. KAFLI
Gildistaka.

12. gr.

Reglugerð þessi er sett með hliðsjón af 2. gr. íþróttalaga nr. 49/1956 og öðlast þegar gildi.

Menntamálaráðuneytið, 26. apríl 1991.

Svavar Gestsson.

Árni Gunnarsson.

AUGLÝSING
um liti íslenska fánans.

Litir þjóðfána Íslendinga ákvarðast sem hér segir:

Litirnir miðast við SCOTDIC-litastigann (Standard Colour of Textile, – Dictionaire Internationale de la Couleur) þannig:

Heiðblái liturinn: SCOTDIC nr. 693009.

Mjallhvíti liturinn SCOTDIC nr. 95.

Eldrauði liturinn SCOTDIC ICELAND FLAG RED.

Nánari upplýsingar um fánalitina veitir forsætisráðuneytið og erlendis sendiráð Íslands.

Fáninn í réttum litum og hlutföllum skal vera til sýnis í Þjóðminjasafni Íslands og hjá lögreglustjórum landsins.

Ákvæði þessi eru sett samkvæmt 13. sbr. 9. gr. laga nr. 34 17. júní 1944, um þjóðfána Íslendinga.

Forsætisráðuneytið, 23. janúar 1991.

Steingrímur Hermannsson.

Guðmundur Benediktsson.